

欽
定
全
唐
文

欽定全唐文卷四十四目錄

肅宗 三

宣慰京城僧道父老勅

宣慰西京官吏勅

禁京城酤酒勅

置司天臺勅

減省服膳勅

行輕重錢勅

重稜錢減價行用勅

職田準舊式輸送至京勅

大祀用上元舞勅

甄敘皇屬勅

授顏真卿太子少師勅

答御藥師道場念誦僧元皎等表賀瑞李勅

春令減刑勅

答李含光勅

賜李含光勅書

答顏真卿讓憲部尚書御札

答顏真卿謝兼御史大夫批

答顏真卿謝馮翊太守批

答顏真卿謝蒲州刺史批

答顏真卿謝浙西節度使批

答顏真卿謝祖昭甫贈官批

答顏真卿乞書天下放生池碑額批

立成王爲皇太子德音

春令減刑德音

大赦德音

即位大赦文

收復兩京大赦文

冊成王爲皇太子文

欽定全唐文卷四十四

肅宗 三

宣慰京城僧道父老勅

勅西京緇黃耆壽百姓頃者逆兵暴至侵逼長安王事西
巡修集兵馬遂使卿等陷於賊手不得奔逃或骨肉之間
枉罹屠害子女之輩多遭虜掠朕每念此流涕痛心又比
來米鹽匱竭人多餓死道殣相望或賊徒逼脅驅使事窮
力屈盡是脅從朕甚憫焉今已京城再復賊寇殲滅豈獨
宗廟之福祉稷之靈京師等兆民懇誠感達天地之所致

也方與卿等雪耻辱布維新大棄疵瑕宏宥罪戾恐未達
意或惶恐焉各宜寧居勿懷反側各令宣諭與卿等不久
相見

宣慰西京官吏勅

勅西京官吏等逆胡搆禍暴犯京邑我國家圖必勝之勞
取萬全之功是以避狄而西外飭師旅遂使卿等奔竄無
所力屈狂寇既閉之以師旅又臨之以兵戈或強逼驅馳
或僞署官爵事不獲已皆是脅從朕深悉焉無懷反側今
天既悔禍宗廟垂靈王師東征雷擊電掃逆徒勦絕關輔

載清卿等代承國恩家傳祿位乃祖乃父爲我純臣雖陷賊中固深憂憤是用惻隱矜憫於懷宜各自安更勿惶懼朕與人更始豈求錄微瑕哉旬日之間與卿等相見

禁京城酤酒勅

爲政之本期於節用今農功在務廩食未優如聞京城之中酒價尤貴但以麴蘖之費有損國儲游惰之徒益資廢業其京城內酤酒即宜禁斷麥熟之後任依常式

置司天臺勅

建邦設都必稽元象分列曹局皆應物宜靈臺三星主觀

金史卷之五十二 禮一
察雲物天文正位在太微西南今興慶宮上帝庭也考符之所合置靈臺宜取永寧坊張守珪宅以充司天臺所司量事修理仍置五官正五人司天臺內別置一院曰通元院應有術藝之士徵辟至京於崇元院安置

減省服膳勅

寇孽未平務懷撝挹自今已後朕常膳及服御等物並從節減諸作坊造坊並停比緣軍國務殷或宣口勅處分今後非正宣並不得行用中外諸務各歸有司英武軍及六軍諸使比因論竟便行追攝今後須經臺府如處斷不平

具狀聞奏自文武五品已上正官各舉賢良方正直言極諫一人任自封進兩省官十日一上封事御史臺欲彈事不須進狀仍服豸冠殘妖未殄國步猶難共體至公以康庶政朕推誠御物與衆共之思與蒼生臻夫至道宣示中外知朕意焉

行輕重錢勅

九府陳規百王不易或以輕爲重蓋取適時以重爲輕用爲救弊則有形分龍馬勢寫刀龜子母相權變通斯在今國步猶阻帑藏未充重斂乃人因不堪薄征則軍賦未足

是以頃令改鑄務於濟時自開元行用已來頗亦公私宏益今可於絳州諸鑪加樣起鑄更增新郭不變舊文每以一錢用當五十利豐費約實允事宜其錢以二十斤成貫自餘錢監並聽依舊享茲厚利足以富國人安俗阜朕復何憂仍令鑄錢使即勾當起鑄新錢或有奸濫所由奉法勿至寬容仰州縣明示錢樣切須捉搦勿使違越在京官寮比無俸料桂玉之費將何以堪宜取絳州新錢給冬季俸料即仰所由申請計會支給且艱難之際家國當同頃者急在軍戎所以久虧祿俸眷言優恤恒愧於懷今甫及

授衣略爲賙給庶資時要宜悉朕懷

重稜錢減價行用勅

因時立制頃議新錢且是從權知非經久如聞官鑪之外私鑄頗多吞併小錢踰濫成弊抵罪雖衆禁奸未絕況物價益起人心不安事藉變通期於折衷其重稜五十價錢宜減作三十文行用其開元舊時錢宜一當十文行用其乾元當十錢宜依前行用仍令中京及畿縣內依此處分諸州待進止

職田準舊式輸送至京勅

京官職田準式並合佃人輸送至京中間揚國忠奏去城
五十里外貯納縣倉本官自差人請受緣是暫時寄貯所
繇觸途乾沒中閑司尤被抑屈公私不便因循累年自今
已後京兆河南府諸縣並令依舊送京輸納本官如邀詰
停留并輒受加耗請準所費及剩數計贓以枉法論至死
者加役流

大祀用上元舞勅

供祠祭上元舞前令大祠享皆將陳設自今已後圓丘方
澤太廟祠享然後用此舞餘祭並停

甄敘皇屬勅

勅五代則遷以尊祖禰三族之別以辨親疎故禮曰祖遷於上宗易於下六代而親屬竭矣先王所以敘昭穆明等夷不可得而變革也應追赴山陵及先在城於西宮陪位同五等親宗子等系自本枝分於天派繫之以姓而無別約之以禮而有差朕天禍所鍾哀纏罔極嗟我公族儼然來斯遠倍七月之期俯就三年之制降殺以等存乎典彝名位不同禮亦異數有司定儀將從籍屬之條天下爲家用廣孝慈之道惇睦九族其在茲乎應追到及在城同五

等親宗子等五品已上各加一階六品已下前資常選并散官至簡日稍優與處分未出身者量才授文武散官其中有才學行藝爲衆所推及嗣郡王嘗經任使灼然著聲績者宜委宗正卿琬漢中王瑀光祿卿涵錄其名實具狀聞薦自天寶以來闕造宗籍宜令宗正等重申舊制昭辨等序即宜勘造圖籍宣示中外知朕意焉

授顏真卿太子少師勅

勅國儲爲天下之本師導乃元良之教將以本固必由教先非求忠賢何以審諭光祿大夫行吏部尚書充禮儀使

上柱國魯郡開國公顏真卿立德踐行當四科之首懿文
碩學爲百氏之宗忠讜罄於臣節貞規存乎上範述職中
外服勞社稷靜專由其直方動用謂之懸解山公啟事清
彼品流叔孫制禮光我王度惟是一有實貞萬國力乃稽
古則思其人況太后崇徽外家聯屬顧先勲舊方睦親賢
俾其調護以全羽翼一王之制咨爾兼之可太子少師依
前充禮儀使散官勲封如故

答御藥師道場念誦僧元皎等表賀瑞李勅

瑞李繁滋國之興兆生在伽藍之內足知覺樹之榮感此

殊祥與師同慶

春令減刑勅

國之用刑兼在於慎恤王者布澤亦貴於乘時所以大易
陳規必議緩獄周官設教遵於中典朕躬臨寶位憂念黎
元乾乾之心日慎一日況兵戎未息征役尤繁哀此下人
無忘夕惕如聞州縣之內多有累囚囹圄之間動淹時序
每軫納隍之慮常懷解網之仁屬陽春布和品彙咸達宜
覃在宥之澤俾叶生成之化其天下見禁囚徒死罪降流
流已下一切放免其十惡反逆及偽造頭首強盜劫殺官

吏犯贓枉法等害政既甚在法難容不在此限其諸供司
及作曹非切要外並宜減省京畿諸色和糴一切並停其
天下百姓灼然單貧交不存者緣租庸先立限長行每鄉
量降十丁猶恐編戶之中懸磬者衆限數既少或未優矜
其實不支濟者宜令每鄉量更矜放待資產稍成任依常
式以天下未寧頻申赦令公私庶務優恤蓋多載覃宥過
之恩庶及措刑之美宣示中外知朕意焉

答李含光勅

深通道妙久著名聞昔茅君之山今洞真之奧以師德行

良景慕之朕頃總干戈掃除凶慝保全萬姓克定兩京上
皇聖駕迎還宮闕得此定省慶慰自天仰荷元元之祐再
成宗社之業亦師精修願力有以助之必須加意壇場潔
清香火廣上皇之福壽俾六合之康寧靜正道門當在師
也所謝知

賜李含光勅書

久契真要深通元微游逍遙之境得朝徹之道上皇疇日
順風見知今乃鍊質名山良多景慕也況茅君洞穴仙經
所稱靈化往來神藥斯祕師當閱金籙之祕訣祈元宮以

清修驗消災之方効長年之術尤宜精勵庶表齋功夏熱
師得平安好遣書指不多及

答顏真卿讓憲部尚書御札

卿才推翰苑望重朝廷昆弟成名俱效忠節頃蠶蠶縱毒
郡邑多虞卿能審事宜捍禦兇盜雖平原不守而功效殊
高自遠歸朝深副朕望允膺曳履之命無至免冠之請

答顏真卿謝兼御史大夫批

卿德重才博久而益彰深竭忠貞克著名節乃今再造區
夏藉卿以振朝綱曳履之榮允膺其象弄印之寵無以易

卿既簡朕心不至謙讓所謝知

答顏真卿謝馮翊太守批

卿夙負名器列在朝廷委弄印之傳兼曳履之寵而乃事
乖執法情未滅私朕念以舊勲遂從寬宥今左輔之郡凋
敝之餘宜加撫存以申來效所謝知

答顏真卿謝蒲州刺史批

卿簪紱之端名節素重出鎮藩翰克效忠勤況自同及蒲
襟帶相接宣風布化實佇於卿特委股肱尤當勉勵防虞
恤隱必應事宜所謝知

答顏真卿謝浙西節度使批

卿學行有聞謀猷克壯屢經寒歲不改松筠且江寧古之
帝都實爲巨防自非宿德其可濫居委卿忠誠俾當連帥
宜宏籌略爲朕緝綏所謝知

答顏真卿謝祖昭甫贈官批

卿之乃祖當爲碩儒旣高倚相之能遂有臧孫之後不墜
其業在卿之門式覃追遠之恩俾蒙貽厥之慶加贈方岳
以表哀榮所謝知

答顏真卿乞書天下放生池碑額批

朕以中孚及物亭育爲心凡在覆載之中畢登仁壽之域
四靈是畜一氣同和江漢爲池魚鼈咸若卿慎徽盛典潤
色大猷能以懿文用刊樂石體含飛動韻合鏗鏘成不朽
之立言紀好生之上德唱而必和自古有之情發於中予
嘉乃意所請者依

立成王爲皇太子德音

守器爲重擇賢而立萬國繇其永貞百王以之垂範蓋以
重社稷而奉棗盛也朕纘承洪緒惟懷永圖丕膺皇極旣
符域中之大茂建元儲用崇天下之本皇太子倣植性恭

懿因心孝友文武之德克聞於日躋君親之誠實原於天性往以時屬艱阻義扶宗社故能外清元祿內復皇圖繇是肇啟承華懋昭嘉緒今撰辰斯及冊命攸行宜承繼明之慶俾廣洊雷之澤可大赦天下頃者頻興大典累洽殊私率土之間屢經蕩滌猶慮近有冒法或滯狴牢其天下見禁囚徒已下罪一切放免内外文武官三品已上者賜爵一級四品已上各加一階五品已上官子爲父後者賜勳兩轉頃因國用不足頒賜未周今所鑄新錢數盈於萬其京官文武五品已上及常參官六軍將士東北京留守

及諸道節度將士等各賜有差其唐元功臣成都元從及朕元從功臣等普恩之外更賜一爵四品已下更加兩階其在靈州及寧州至鳳翔者仰所司類例更遞加一等皇親及諸色陪位人等各賜勲兩轉其鴻臚蕃客賜絹一千匹天下義夫節婦孝子順孫旌表門閭終身不事京官五品已上各舉忠正孝友文儒周慎堪任東宮官者務取實才不得虛薦今餘寇未殄有脅在賊中未歸順者一切不以爲罪其有受賊節制能以兵降者酬其封爵且爲政之要求賢是急比令中外薦舉多非實才所以詢事考言登

科蓋寡猶慮巖穴之內尚有沈淪宜令所在州縣更加搜
擇其懷才抱器隱遁邱園以禮徵送如或不赴具以名聞
凡與前詔科目相當一切委内外文武五品已上官有所
知者不限人數任各薦聞如自舉者亦聽於所在投狀有
堪任用不限常資其行人家及羸老單貧鰥寡惇獨已頻
有處分宜令州縣長官倍加優恤應緣冊禮職掌要重者
及撰冊書舁寶官禮官等普恩之外賜勲兩轉其禮儀使
特賜一階副使普恩之外賜爵一級勅文有不該者所司

類例奏聞

春令減刑德音

乘時布澤有國之彝訓議獄緩刑前王之茂典繇是洽其
麇卵殷湯宏解網之仁順彼陽和漢后有錄囚之詔育物
施惠抑惟舊章朕纘服鴻業祇膺寶位何嘗不日旰忘食
中夜求衣慮一物之失所憂四方之未乂雖身居黃屋而
志在蒼生今寇孽爲虞征輸未息猶恐提戈釋耒未有厚
於人時真棘埋梧或慮盈於幽囹屬三陽啟候萬物遂生
宜覃在宥之澤庶叶維新之令其天下見禁囚徒死罪降
從流以下並釋放京城宜令中書門下即分往府縣御史

臺大理寺即親自按問疏決訖具狀聞奏諸府州各委所
繇長官準此處分諸色流人及左降官等所繇類例並與
量移仍委中書門下議覆奏取處分其先緣安祿山僞署
三司有名應在流貶者原情議罪負國誠深朕已捨其殊
死竄於荒徼固當與衆共棄長爲匪人然皆邦家舊臣嘗
挂纓冕使其終沒裔土永匿慙魂孰若貸以殊私俾令効
節亦準例處分兼委中書門下量輕重類例奏取處分比
緣寇盜之內干戈脅從白刃臨頸胡寧忍決所以陷於兇
黨苟免者多從前詔書頻已該及其史思明將士及僞署

官屬等有束身歸順并率衆來降官爵如初一無所問以城邑降者仍別加封爵餘兇黨之流亦同此例天實臨照朕無食言王者設教務農爲首今土膏方起田事將興敦本勸人實爲政要宜令天下刺史縣令各於所部親勸農桑百姓中有勤勞耕耘積其菽粟或贍於閭里或能益軍儲委所繇長吏具狀奏聞當特與甄賞仍令有司第其高下量酬五品以下官員其百司及州縣興工力役不急之務一切並停諸軍兵健應在行營有羸老疾病不任戰陳者各委節度使速揀擇放還路次州縣量加濟恤諸色番

役各令所司減省放其營農且寇孽未平軍戎當備毗庶
之內征賦猶繁朕所以親帥公卿躬行節儉而詔書屢下
蠲免蓋多國計軍儲取給而已猶欲累加損益以惠黔黎
宜委中書門下勾當令度支使與諸供司一切減省應可
蠲免每司各條件聞奏當使施行

大赦德音

元首之義以人爲心外有凋傷內懷慘怛罪歸於己情見
乎辭伯禹深泣辜之仁漢皇下哀痛之詔與理同道惟刑
是恤朕志宏覆載運屬艱難思措大刑俾登壽域風以解

愠時當發生國有舊章已懸書於象魏恩宥在宥宜釋繫
於狴牢其天下見禁囚徒罪無輕重一切放免其官典犯
贓情雖難恕特從寬典許以自新並宜納贓放所犯罪左
降官等即與量移近處諸色流人及効力罰鎮人等並即
放還其有亡官失爵亦與收敘比來兵革不息年穀未登
百姓流離至於困弊戰士暴露頗聞闕乏或先有結聚及
有違軍令但宜改過自効前事捨而不論艱虞以來多冒
刑辟道存善貸屢有德音庶其最靈咸自改勵宣示中外
知朕意焉

即位大赦文

朕聞聖人畏天命帝者奉天時知皇靈眷命不敢違而去之知歷數有歸不獲已而當之在昔帝王靡不繇斯而有天下者也乃者羯胡亂常京闕失守天未悔禍羣兇尚扇聖皇久厭天位思傳眇身軍興之初已有成命予恐不德罔敢祇承今羣公卿士僉曰孝莫大於繼德功莫大於中興朕所以理兵朔方將殄寇逆務以大者本其孝乎須安兆庶之心敬順羣臣之請乃以七月癸丑朔十二日甲子即皇帝位於靈州敬崇徽號上尊聖皇曰上皇天帝所司

擇日昭告於上帝朕以薄德謬當重任旣展承天之禮宜
覃率土之澤可大赦天下改元曰至德大辟罪已下常赦
所不免者咸赦除之其逆賊李林甫王鉷楊國忠近親合
累者不在免限百姓官吏能率親屬去逆歸順者有官加
其優獎斬得逆賊父子不問首從當錫爵土別有褒崇其
直言極諫才堪牧宰文詞博達武藝絕倫孝悌力田沈淪
草澤委所在長官聞薦詣闕自陳者亦聽東宮官屬旣會
昌期合承寵命量加改轉諸色勾徵逋租懸調及官錢在
百姓腹內並宜放免靈州改爲靈武郡大都督府上縣爲

望中縣爲上官寮等一切便授天下者壽各賜物五段侍
老版授太守縣令有差各賜物五段諸道百姓委本道採
訪使差郡縣官存問四方將士各賜馬一匹六品已下賜
物十段天下寺觀各度七人太守並限三考然後轉御史
取曾任郡縣理人官者後可薦用所有彈奏一依貞觀故
事官吏犯枉法贓終身勿齒自古聖帝明王忠臣烈士五
嶽四瀆名山大川並令所在致祭孝子順孫義夫節婦旌
表門閭内外文武官九品已上各賜兩階賜勳兩轉三品
已上賜爵一級

收復兩京大赦文

軒轅有版泉之戰堯帝有丹水之師湯有葛伯不祀周有
獫狁孔熾古之王者奉若天命違道不敢不正干紀不得
不誅日者逆胡猖狂敢行稱亂朕嗣守鴻業欽承睿圖枕
戈嘗膽撫劒泣血罔不夙夜若涉春冰賴天地疾威社稷
憑怒上皇丕烈萬國永懷因時致討爲人請命由是義夫
奮發回紇籍兵邦圻關輔之士汧隴河湟之衆沙朔羌戎
之騎微盧蠻貊之人萬里雲趨四方霧合旣張我伐咸乃
一心蠢茲蠭蠶之餘尚負螳螂之力自京南合戰維北追

奔百萬摧鋒一戎而定昔夏以有窮之亂克之者四十年
漢以新莽之篡復之者六千日今環周未載氛祲廓清風
振海而波盪雷破山而石裂區宇重闢日月增輝此皆三
靈叶贊累聖垂祉豈予小子能集大勲頃以先掃宮室奉
迎鑾駕紫宸初正黃屋未歸耆老之望則深庭闈之戀猶
積所以自天之澤必奉於承顏作解之恩尚稽於候命今
六飛屆止萬姓昭蘇義奉君親慶深家國不失舊物與俗
惟新宜宏肆眚之典共喜以康之福可大赦天下常赦所
不免者咸赦除之其逆人能自投降率衆款附及殺獲逆

人以所部郡縣軍城降者並加超賞應與安祿山同謀反
逆支黨及李林甫王鉞楊國忠等一房並不在免限武德
開元及蜀郡靈武元從功臣有先已歿死王事者並加優
贈各與子孫一人官乘輿幸蜀天步多難人心且搖臣節
斯見太子太師豳國公韋見素開府儀同三司內侍監齊
國公高力士開府儀同三司右龍武大將軍潁川郡公陳
元禮開府儀同三司左龍武大將軍田長文開府儀同三
司右龍武大將軍張崇俊右龍武大將軍特進杜休祥等
勇不顧死危能致命或竭誠羽翼仰北辰而環拱或叶契

心膂聚東井以全歸疇茲錫社之封永以誓河之義見素
加開府儀同三司食實封三百戶力士加實封三百戶元
禮進封蔡國公實封三百戶長文進封鴈門郡公崇俊進
封南陽郡公休祥進封馮翊郡公各實封二百戶朕冀行
天罰誓兵朔野幸以一旅之衆遂成九有之師言念經綸
豈忘締構銀青光祿大夫尚書右僕射裴冕識宇冲深體
局貞固輸忠佐命肇啟興王加開府儀同三司封冀國公
食實封三百戶光祿大夫殿中監同正員判行軍事李輔
國志除奸惡忠誠濟危加開府儀同三司殿中監依前判

行軍事封成國公實封五百戶銀青光祿大夫宗正卿兼
工部侍郎李遵義切維城勲參定國加特進封鄭國公實
封二百戶開府儀同三司兼鴻臚卿同正員中軍都知兵
馬副大使管崇嗣能訓戎律以佐兵權進封鉅鹿郡公實
封二百戶中軍都虞侯特進鴻臚卿同正員李鼎加開府
儀同三司進封保定郡公雲麾將軍右武衛大將軍左羽
林軍宿衛內供養王炨加特進太原縣侯仍各實封一百
戶自寇賊姦宄王師未振瞻言京國尚聚犬羊廣平王俶
循學好古令德孝恭志存邦家誓雪讎耻爰鞠其旅元戎

啟行可封爲楚王實封二千戶銀青光祿大夫尚書左僕射兼武部尚書同中書門下平章事兼靈武大都督府長史單于安北副都護持節充朔方節度使關內支度營田鹽池押諸番部落副大使知節度事六城水運朔方管內採訪處置使郭子儀才光三傑功格十臣克焯皇威載昌大業加司徒兼尚書左僕射進封代國公食實封二千戶平章事已下並如故開府儀同三司兼鴻臚卿同正朔方左廂兵馬使同節度副使姑臧縣伯僕固懷恩進封豐國公實封二百戶開府儀同三司兼右金吾衛大將軍同正

仍充四鎮伊西北庭行軍兵馬使李嗣業履險忘軀破敵
定難可兼衛尉卿同正封虢國公食實封二千戶銀青光
祿大夫守司徒戶部尚書同中書門下平章事兼御史大
夫鴻臚卿太原尹北京留守河東節度副大使薊國公李
光弼全德挺生英才間出干城禦侮坐甲安邊可司空兼
兵部尚書同中書門下平章事進封魏國公食實封八百
戶開府儀同三司御史大夫兼工部尚書持節充招討西
京并定武威武興平等軍兼關內節度河西隴右伊西四
郡行營兵馬使王思禮養銳先鳴蓄奇後殿可開府儀同

三司行工部尚書兼御史大夫封霍國公實封六百戶光祿大夫太常卿同正兼御史大夫淮南西道節度採訪使潁川太守來瑱可開府儀同三司兼御史大夫封潁國公餘如故特進太僕卿南陽太守兼御史大夫權知襄陽事金鄉縣公魯炅蘊是韜略副茲節制可開府儀同三司兼御史大夫封岐國公仍各食實封二百戶兼京兆尹持節充京畿採訪計會招討宣慰處置事崔光遠毀家成國致命前茅可特進行禮部尚書封鄴國公食實封三百戶開府儀同三司李光進慎固封守克獻殊勲封范陽郡公食

實封三百戶賢非后不享后非賢罔乂社稷之固必在良臣左相苗晉卿忠不忘君才惟濟代弼成大業保乂王家可特進行侍中封韓國公食實封五百戶憲部尚書同中書門下平章事李麟蘊德成務含貞軌物發揮帝業潤色皇猷可金紫光祿大夫刑部尚書同中書門下三品封褒國公銀青光祿大夫中書侍郎同中書門下平章事崔圓允釐庶績康濟多難一正天下大庇生人可特進行中書令封趙國公食實封五百戶朝散大夫守中書侍郎同中書門下平章事河南節度採訪處置使賜紫金魚袋張鎬

謀猷惟允綱紀立程總茲戎律懿是謀府封南陽縣公餘
並如故銀青光祿大夫太子少師房瑄嘗以經術輔導朕
躬加金紫光祿大夫少保嗣虢王巨頃以宗枝居守京邑
加光祿大夫御史大夫越國公峘總兼元戎克寧全蜀可
金紫光祿大夫戶部尚書郇國公韋陟持衡流品式序百
工可金紫光祿大夫吏部尚書銀青光祿大夫守禮部尚
書李峴饋運周給開物成務可光祿大夫行御史大夫兼
京兆尹封梁國公太中大夫吏部侍郎賜紫金魚袋蘇震
供億烝徒臨事益辦可銀青光祿大夫行吏部侍郎其赴

蜀郡靈武元從官及在路扈從官三品已上與一子官四品已下與一子出身六品已下量與進改功臣將士勲業高者別有處分應見任五品已上當別與一品階其陣亡人令所在郡縣收骸骨瘞埋具酒食致祭各與追贈其家給復二載諸郡縣牧或隔絕賊境則困於幽殘或犒宴官軍則弊於賦歛其來載租庸三分放一其天下百姓應諸色人勾徵及欠負官物一切放免宜令中書門下簡使即分道宣慰所至郡縣審問百姓間利害有須釐革處置者一一聞奏其園苑內有閑廐使總監各據所管地界耕種

所牧草粟以備國馬其宮女及狗獠鷄鷹鷄之類宜即停
減屋宇車輿衣服器用並宜準式珠玉寶鈿平脫金泥織
成刺繡之類一切禁斷學官即宜精選務令講習簡擇郎
官有堪任太守縣令者委京清資五品已上及郎官御史
聞薦其郡縣官有灼然清白理行尤異百姓中孝悌力田
不求聞達者委採訪使聞奏其有文經邦國學究天人博
於經史工於詞賦善於著述精於法理軍謀制勝武藝絕
倫並任於所在自舉委郡守銓擇奏聞不限人數其律令
格式未折中者委中書門下簡擇通明識事官兩三人並

法官兩三人刪定近日所改百司額及郡名官名一切依
故事頃以上皇在蜀朕亦居岐蜀郡宜改爲南京鳳翔宜
改爲西京西京爲中京蜀郡改爲成都府鳳翔府尹以下
官寮並依三京名號吳山爲吳嶽其祠享官屬並準五嶽
故事天柱山老君廟改爲啟聖宮五品已上清資官及三
品已上官上郡太守父見在無官及官卑並與五品官父
母先亡歿者贈一人官祖母亡歿亦賜邑號忠臣事君有
死無二烈士徇義雖滅猶存其李愷盧奕顏杲卿袁履謙
許遠張巡張介然蔣清龐堅等即與追贈訪其子孫厚其

官爵家口深加優賞其内外文武官有枉遭逆賊殺害及身赴朝廷并逃難山谷其父子兄弟伯叔等爲賊捕捉損害及謀反城人言語洩漏因遭殺戮並勘實聞奏當以追贈天下侍老八十已上版授有差並贈緋魚袋太原久遭逼圍給復三載上黨三度被攻給復五載其南陽潁州靈昌睢陽雍邱等郡縣堅壁多時力窮方下絕食尚守情亦可矜各給復三載其好時奉仙兩縣進退禦寇徵求復多各給復三載蜀郡上皇親幸萬乘久居明年租賦宜依常式起後載給復三載良娣張氏旣望氣知歸亦當熊見節

可冊爲淑妃進封南陽王係爲趙王新城王僅爲彭王潁川王儻爲兗王東陽王佺爲涇王第九男儻爲襄王第十男倕爲杞王第十一男偁爲邵王第十二男侶爲興王第十三男侗爲定王淑妃以下所司擇日即行冊命雖知人之明慙於則哲而睦親之義蓋所隨時持盈尊師儀王已下各賜五百匹諸長公主各與一子官嗣王及郡縣主各與一子六品官皇五等已下及九廟子孫及親等人見在者並與轉改内外文武官三品已下各加一階應敘三品五品量加減兩考蜀郡鳳翔扈從從官九品已上賜勲兩

轉溥天下賜醮五日

冊成王爲皇太子文

維乾元元年歲次戊戌十月庚子朔五日甲辰皇帝若曰
於戲自昔聖王咸建儲貳蓋將嗣守神器虔奉宗禋是以
禮經著元貞之德易象載重明之義朕纘服鴻緒丕承前
烈爰外主鬯之賢實符當璧之命咨爾太尉

唐書作
元帥

成王

倣道備文武生資睿哲溫文彰於日就孝友稟於天成往
以兇醜亂華干戈集事是能出陪戎駕入奉廟謀克符丹
水之師實翦綠林之盜所謂功定社稷義寧君親今萬邦

以貞三善斯屬宜膺上嗣之典俾踐少陽之位是用命爾
爲皇太子以副朕躬爾其思王業之艱難遵聖人之炯戒
非尊賢無以成德非廣孝無以承親遠斥佞詢謀正直
兢兢業業庶保於大猷然後無忝爾祖宗克寧我邦家往
欽哉丕膺景命可不慎歟

欽定全唐文卷四十五目錄

肅宗

四

冊太上皇尊號赦文

乾元元年南郊赦文

改元上元赦文

去上元年號大赦文

元年建卯月南郊赦文

改元寶應赦文

賀內道場靈異表

辭尊號上太上皇表

辭大聖尊號並上太上皇尊號表

再請上太上皇尊號表

謝進丹竈宣示史館表

張天師贊

葉法善像贊

欽定全唐文卷四十五

肅宗

四

冊太上皇尊號赦文

古者父有天下傳歸於子子有天下尊歸於父有國所以
繼統立身莫若揚親其義遠矣我太上至道聖皇天帝惟
皇降衷敷祐於上允文允武乃聖乃神道合乎乾坤德明
於日月粵若增崇九廟巡謁五陵天子之孝也嚴禋二郊
升中東嶽聖人之表也制禮作樂闡學明刑帝皇之業也
戡定多難懷柔百蠻霸王之功也於是乎爲而不宰成而

勿居神超象外之先心契合莫之境釋負於小子俾承於
丕構討伐叛逆綏懷四方豈朕所能皆聖皇之訓也頃者
親授寶符載錫美稱願朕不德弗克負荷君父之命若登
於天祖宗之緒恐墜於地一昨與羣公百寮庶尹衆士圖
惟帝載欽若聖謩自古以來百王垂範文明濬哲孝友寬
仁豈有如我開元之盛也乃稽大典上徽號曰太上至道
聖皇天帝累日誠請不蒙許納至於數四今茲俯從允膺
天休克副人望朕上迫嚴旨曲被殊私迎春之初承奉嘉
命聖皇所賜曰光天文武大聖孝感皇帝名以制義亦爲

實賓卑不踰尊是昭物則恭惟聖造何敢當仁頃以鴻業
載昌有虧公議復以大聖二字深僭皇猷讓非飾詞言必
形泣承順顏色而宸睭不迴祇膺寵光乃夕惕增厲今惟
新景命禮洽於尊親誕受徽章敬在於順上發生萬物行
慶其時孚佑兆人緩刑斯在宜宏霈澤以布陽和可大赦
天下改至德三年爲乾元元年起二月五日巳前大辟罪
無輕重常赦所不免者咸赦除之其兩京文武官應三司
先推勘者本罪中遞減一等處分其合放者三司具條件
奏聞自開元巳來將相大臣非反逆及犯名教枉法贓罪

者流死許其家人以禮收葬其陷在賊境爲其殺戮未經
追贈者據本官追贈公主并郡王嗣王郡主縣主及皇五
等已上親被逆賊殺害者各與子孫一人官使其瘞藏亡
失骸骨者各招魂葬身死者三品已上各與追贈仍各與
一子官五品已上一子出身六品已下量事追贈其元從
聖皇天帝至成都府文武官五品已上宜與一子官六品
已下超資進改聖皇至成都府後到官及寧州靈州首末
扈從三品已上與一子官五品已上放一子出身情愿迴
授周親及親近亦聽六品已下量與改轉鳳翔府以歸順

前者普恩外加一階車駕出城後任官潛藏不仕逆賊即與處分唐元功臣普恩外賜爵一級身亡歿者子孫一人加一階其諸道節度下將士三品已上與一子官五品已上放一子出身六品已下量與改轉勲業高者各委本使聞奏諸道留後將士普恩外賜恩三轉自開元已來宰輔之家不爲逆賊所汙者與子孫一人官賊陷兩京文武常參官及諸州刺史絕脰仰藥不事叛人爲衆所知者量加優贈有脫身賊庭妻子被屠戮者委所司勘會聞奏其天下孝義門各與一子官委採訪使具名奏聞量文武處分

其左降官非反逆緣坐及犯惡逆名教枉法盜賊如有親年八十已上及疾患在牀枕者不堪扶持更無兄弟許其停官終養其流人亦準此自今已後應有以醫術入仕者同明法例處分天下百姓今年租庸並放其百司府縣諸色雜供各宜減半其雜徭役非要切者一切並停其天下州縣有遭逆賊攻擊堅守不下竟以獲全其官人百姓中有實効灼然爲衆所知者宜令本道使案驗奏聞據狀迹酬其官賞身亡歿者重加褒贈有父母存者仍與一官及邑號無父母者與妻子有一家丁壯盡被屠害者其父母

妻子仍令州縣以官物賑恤并量造舍宇使得安存其州
因城陷被賊殺戮殘毀者委本道使勘責取實各量免其
二三年租賦自逆賊以來有匹夫匹婦節義可稱者並旌
表其閭墓其流亡戶復業者委本道使與刺史勾當賑給
并與種子犁牛仍免三年租賦内外文武官三品以上各
賜爵一級四品已下及四方通表使各加一階五品已下
各賜勲兩轉其刺史上佐錄事參軍縣令委中書門下速
於諸色人中精加訪擇補擬判司丞已下宜令所繇先於
兩京潛藏不仕逆賊及固託疾病官中簡擇資考深才堪

者銓註續發遣皇五等已上親及九廟子孫有才學政理
委宗正寺揀擇聞薦其有任僞官及掌兵馬軍將能即來
各還本官仍別優賞其左降官諸色流移配隸安置罰鎮
効力之類亡官失爵解退放歸田里及安祿山反黨緣坐
不在免限李林甫王鉷楊國忠等一房去年十二月十五
日制後所犯並準前制處分

乾元元年南郊赦文

朕聞皇天有命皇王受之命之爲君孝理爲本莫不欽崇
前烈聿修禋享之儀對越上元式陳郊禋之敬美其盛德

商頌有奏鼓之音告厥成功夏書有錫珪之慶國之大事
實在於斯閒者孽胡亂常暴殄天物致圖書禮樂或阻於
干戈宗廟神祇有虧於享祀朕誕受明命龔行天罰羣妖
克殄封鯨鯢以示威王室既寧奉鑿輿而載復太上聖皇
天帝功格天道邁胥庭思凝神於姑射將釋負於宸扆
俾予小子纘承大統夙夜祇懼俯盡臣子之心親親尊尊
庶極於此是用追崇先后建立中宮永言孝思感徽音於
文母俾行婦道想釐降於虞嬪情理於是獲申人倫以之
攸敘然後執瓚清廟歌五聖之重光燔柴圓丘覩百神之

受職復修祭禮再備樂章尊祖配天不失舊物今大禮斯
舉元符允答行慶施惠尚屬於陽和出繫挺囚必當於時
令思與天下更布惟新宜覃肆眚之恩以洽雍熙之化可
大赦天下除反逆之黨緣坐謀殺十惡劫盜臨監主掌自
餘一切原免其餘逆賊元謀及脅從今但歸投並原其罪
仍與官賞其成都元從聖皇功臣及靈武元從功臣並收
兩京將士三京留守諸道節度採訪使普恩外三品已上
賜爵一級四品已上加一階行人賜勳三轉自寇賊以來
官吏百姓中有勞未經酬賞者委所在官長具狀奏聞當

與甄錄天下百姓除正租庸外一切不得別有使役如緣軍務所要自令和市兵士有尪弱羸老並揀擇放其長安萬年兩縣各借錢一萬貫每月收利以充和雇其別勅索物及供諸司并蕃客等左藏雖給價值奏請每引時月宜先給兩縣各五十貫貯於兩市差官專知旋還價值其州府縣門夫勲官並於舊額數減一半其庸丁殘疾人等不須更差其州縣官上什物並以公廨及官人料錢依時價和雇造買不得分配典正其年支口味宜減一半諸使應進鷹鷄狗狍等一切並停應緣南郊百司張設有損百姓

苗稼者委京兆尹隨損多少賠酬所損錢物便即聞奏百姓中有能行仁義分濟貧窮免填溝壑賴救恤者具名聞奏當寵以官職鰥寡憐獨篤疾不能自存及陣亡人家並捐免戶州縣隨事優恤賑給百姓中有事親不孝別籍異財點汙風俗虧敗名教先決六十配隸磧西有官品者禁身奏聞京官九品以上許上封事極言時政得失朕將親覽用佇嘉謀才有可觀別當甄錄草澤及卑位之間有不求聞達未經推薦者一藝已上恐遺俊乂令兵部吏部作徵召條目奏聞錄事參軍職司糾舉自今已後宜升判司

一政以彰委任國子監學生明經法帖策口試各十並通
四已上進士通三與及第鄉貢明經準常式州縣學生放
歸營農待賊平之後任從常式二王三恪各與一子官內
外文武官三品已上賜爵一級四品已下加一階

改元上元赦文

自古哲王恭承景命莫不執象以御宇歷時以建元必當
上稽乾符下立人極者也朕承累聖之鴻業紹大中之寶
位胡孽干紀王師尚勞乾乾之心豈忘鑒寐一物失所每
軫納隍之憂萬邦未寧深懷馭朽之懼賴上元垂福宗廟

降靈百辟卿士同心勦力方冀干戈載戢區宇乂安每勵躬於帝圖常取則於天道屬天人叶紀景象垂文爰遵革故之典將契惟新之命義存更始庶有應於天心澤被無私宜載覃於率土可大赦天下改乾元三年爲上元元年自上元元年閏四月十九日昧爽已前大辟罪已下已發覺未發覺已結正未結正見禁囚徒罪無輕重常赦不免者咸赦除之其與逆賊元謀及脅從受驅使懼法來降并潛藏不出者已頻處分但能歸順捨罪除元惡之外一無所問其史思明必能改圖束手來款亦當洗其瑕釁議以

勲封内外文武官賜爵各有差六軍及飛龍閑廐加賜物
其成都靈武元從扈從遞加有差在外諸軍各加錄賞物
陣亡將士優加褒贈行人家口所在賑給定禍亂者必先
於武德拯生靈者諒在於師貞周武創業克寧區夏惟師
尚父實佐興王況德有可師義當禁暴稽諸古昔爰崇典
禮其太公望可追封爲武成王有司依文宣王置廟仍委
中書門下擇古今名將配享並置亞聖及十哲等享祭之
典一同文宣自古百王欽慎刑法蓋以法者人之命刑者
國之權苟或失其科條固難措其手足頃以奸臣擅命中

典不修造次便行哀矜何在自今已後其有犯極刑者宜令本司依舊三覆庶平反之際人謂不冤幽明之間理皆無濫又書稱羣望咸秩詩曰祀事孔明爰自遐代尤崇祭祀朕深惟古義必在至誠苟德之不修則神亦無據故知精誠有感黍稷非馨而況宋景發言固三徙而可驗漢文深誠爲千載之明徵事可遵行理當變革有司所立祕祝之法或移於歲或移於人君人之心寧所忍也自今已後削去此法其中祀下祀并雜祭祀等一切並停其諸應合祭祀列於常典所用祭料一依古制務從減省以副朕心

又車服以庸有虞盛典威儀以等周禮舊章往屬承平多
歷年所至於公卿列位中外在官多以奢僭爲心流弊成
俗宜令所司定王公已下車服產業各詳古制及令式作
節限聞奏自頃戎車未息殘孽猶虞軍吏獻功務陳首級
且四海之內孰非王人豈以苟從昏迷陷在夷戮一朝授
首懸彼藁街朕志在好生憫其驅脅其諸軍所獲首級除
元惡之外一切不得傳送又設官分理本在安人遞遷之
政務於利用今寰瀛之內兵革未清加以時或不登物皆
踴貴軍儲是急廩稍靡供冗官之流固甚勞弊其京閒司

官等有材堪釐務者宜命中書門下即類例量資歷出授
外官王者稽古設教擇賢以理廣徵岩穴用副薪樵宜令
中外五品已上文武正從員官各舉賢良方正直言極諫
各一人武藝文才俱堪濟理者亦任狀舉其或文乏詞策
武非騎射但權謀可以集事材力可以臨戎方圓可收亦
任通舉並限制到一月內奏畢自古明王聖帝名山大川
並委州縣長吏擇日致祭義夫節婦孝子順孫旌表門閭
終身勿事

去上元年號大赦文

爲人上者與衆守邦自古哲王懼其滿假聰明濬哲罔不
在躬文武聖神乃以爲號顧予菲薄運屬經綸一旅成師
復其舊物聖皇納人壽域遊意道源神器之重傳歸於朕
獲守丕業若履春冰敢忘謙冲日益招損欲垂範而自我
亦去華而就實其乾元大聖光天文武孝感等尊崇之稱
何德以當之欽若昊天定時成歲春秋五始義在體元惟
以紀年更無潤色至於漢武飾以浮華非昔王之茂典豈
永代而爲則三代受命正朔皆殊宗周之王實得天統陽
生元氣之本律首黃鍾之尊制度可行叶用斯在自今已

後朕號唯稱皇帝其年但號元年去上元之號其以今年十一月爲天正歲首使建丑建寅每月以所建爲數承天陟后稽古臨人必繇革故之源方合大中之道風行寓縣澤被無涯欽承上帝之心申錫蒼生之慶可大赦天下自二年九月二十一日昧爽已前大辟罪無輕重已發覺未發覺已結正未結正見繫囚徒常赦所不免者咸赦除之其十惡五逆及造僞頭首官典犯賊法實難容刑故無小並不在免限其史朝義若能翻然改圖背逆歸順罪無所問加以勲封自乾元元年已前開元已來應反逆連累赦

慮度限所未該及者並宜釋放有官者降資與官無官者依本色例收敘內外官三品已上賜爵一級四品五品各加一階六品已下賜勳兩轉成都府及靈武元從普恩之外三品已上更賜爵一級四五品更加一階六品已下更賜勳一轉眷及勤勞俾其卓敘每以田功在謹農事惟勤不有司存何成重穀諸州等各置司田參軍一人專主農事每縣各置田正二人於當縣揀明閑田種者充務令勸課國之大事郊祀爲先貴其至誠不美多品黍稷雖設猶或非馨牲牢空多未謂能享今以元元孚佑至道爲心將

臻太和不欲多殺禮樂殊制孝敬同歸園丘方澤任依恒
享宗廟諸祠但臨時獻熟用懷明德之馨庶合西鄰之祭
唐虞之代肇有九州王者所都文無異制其京兆府河南
府太原府三京之號宜停鳳翔先爲西京亦宜準此所設
諫曹欲聞諷議允副從繩之望須成削橐之書其諫官令
每月一上封事指陳時政得失若不舉職事當別有處分
其諸州別駕可依舊却置每除京官五品已上正員清望
官及郎官御史諸州刺史皆令推薦一兩人以自代仍具
錄行能聞奏觀其所舉以行殿最京文武官等賜物各有

差自今已後有隱欺勾剝者宜勾當年若事連去年亦任
通勾其隔年者不在勾限官典隱藏在腹內不在此限其
氏姓雖得之久遠有與格諱及隱疾同聲者宜改與本族
望所出大姓自逐穩便名山大川明王聖帝所在廟祠各
委州縣官長虔誠致祭天下侍老先版授者更改與版授
未版授者與版授鰥寡憊獨不能存立者委刺史縣令量
加賑恤義夫節婦孝子順孫旌表門閭終身勿事赦書有
所未及者各令有司速勘會類例條件聞奏

元年建卯月南郊赦文

惟天爲大事之在明惟聖能享承之在德朕託於人上獲
守丕圖思大道之行去鴻名之節文武徽號存而不稱開
統履端建元叶紀美皆有讓言必可陳虔告上元致齋清
廟恭行舊典展禮南郊百神允懷上帝臨我升聞之際其
亦可言昭事以誠實膺多福高而不遠復見其心乃候發
生之時用行嚮勸之道暘谷出日登大明於域中泰山起
雲遍膏雨於天下君人臨照德澤周洽布其寬大豈止於
茲宜行肆眚之恩益廣萬邦之慶可赦天下自元年建卯
月一日昧爽已前大辟罪已下罪無輕重已發覺未發覺

已結正未結正繫囚見徒常赦所不免者咸赦除之其反
逆造偽頭首謀殺故殺并十惡死罪官吏及典正犯贓爲
蠹既深在法難容並不在赦限其史朝義已下脅從將士
及受僞官等棄逆歸順因事立功封賞之外餘無所問其
諸色流人及左降官等前後頻有處分並與量移所繇稽
遲動歷年數宜令有司即申明前後制勅節文速勘責類
例聞奏其中外行業夙著情狀可矜久踐朝班曾經任用
者委在朝五品已上清望官及郎官御史於流貶人中素
相諳委爲衆所推者各以名薦須當才實其内外文武官

三品已上賜爵一級四品已上各加一階成都府靈武元
從功臣三品已上更賜爵一級四品已上更加一階朕敬
授人時慎徽月令庶無備極以獲休徵自今以後每至四
孟月迎氣之日與百辟卿士舉而行之建辰月應番曠騎
宜三分量留一分其餘即放歸營農至建巳月任依常式
諸州刺史縣令及司田參軍令設法勸課令其耕種不得
失時貧不支濟戶仍方圓處置量事借貸務令存立歲終
巡按量其功效便申賞罰諸道貢獻除馬畜供軍之外其
餘鷹鷄狗豹奇禽異獸並不得輒進五都之號其來自久

宜以京兆府爲上都河南府爲東都鳳翔府爲西都江陵府爲南都太原府爲北都孝本天經禮崇國典橫於四海漏及三泉其京資清正員文官五品已上武官三品已上并兩省供奉官御史諸州刺史並諸道節度已下三品已上父母亡沒未經追贈者並量與追贈文武不墜道宏於人務在搜揚俾其展效其諸道入中有詞學高深兼通政理軍謀制勝明習韜鈴者委所在刺史揀擇聞薦京四品已上員文武官任各舉一人孝子順孫義夫節婦旌表門閭終身勿事

改元寶應赦文

上天降寶獻自楚州神明告歷數之符合璧定妖災之氣
總集瑞命祗承鴻休因以體元叶乎五紀其元年應改爲
寶應元年建巳月改爲四月其餘月並爲常數仍舊以正
月一日爲歲首受茲福應佇以升平因日月之重光布雨
露之渥澤其天下見禁囚徒罪無輕重并已發覺未發覺
已結正未結正四月十五日昧爽以前一切放免左降官
宜即量移近處流人一切放迴有司更不得輒有類例條
件其楚州刺史并出寶縣官及進寶官量與進改隨進寶

官典儼等各量與一子官宣示中外宜知朕意

賀內道場靈異表

今月六日伏見陛下昭告上帝陰隲下民勤恤蒼生克成
黃素況靈丹神合祕藥天成聿修增壇奉以行事肅恭展
禮飛章騰踊而入雲虛空有言聖壽靈長而象岳休祐靈
感曠古未聞伏望宣示朝廷錄付史館

辭尊號上太上皇表

陛下顧天位之累已推以付臣臣又畏天命以固辭期不
奉詔未蒙詔許以辱四海而今加之徽號錫以洪名既受

寶符又傳神器是重臣以不德私臣以殊寵豈天地之容乎神人之望乎臣聞禮有常尊器不可假名無虛立義然後行頃以寇逆憑陵京闕失守撫軍監國事在一時正位居中尊無二上至于光天之業允文允武聖由天作孝以感通臣何有焉此皆陛下之能事也曲成之惠在慈愛而愈深至公之道將詢謀而未叶伏望寢茲嚴命俯遂勤誠臣下之情不勝至願

辭大聖尊號并上太上皇尊號表

帝王者天所命也稱號者人所奉也惟有德克躋大寶至

聖以享鴻休于是乎人神形容其美行歌詠之不足或爲之名焉伏惟陛下乾坤覆載河海潤澤道達生靈惠懷蠻貊尊九廟以崇孝謁五陵以奉先禮二郊以嚴禋祠九宮以致敬刻石北京以揚祖烈泥金東嶽以告成功自三五以還歷選列辟聰明文武齊聖廣淵丕懿純殷孰與比議卓哉煌煌真聖人之表也夫天地至大不能定愆伏之序日月運行不能正薄蝕之氣自狂孽開釁倣擾天紀與時消息爲人請命舞干羽而氛祲永清垂衣裳而衽席無改納萬姓於仁壽之域朝百神於清穆之上窅然姑射之山

思訪襄城之野斯又臣言之不及稽古所未聞羲軒唐虞何足以云今方推而不居爲而不有付臣以宗廟重器錫臣以后王徽章何以克堪辭不獲命臣自奉明詔夙夜於邑以爲名不可假尊不可踰敬承嚴旨得爲孝乎至于所託者深所荷者大不敢悉拒以違天衷而大聖二字得之不易求諸故實布在冊書伏望陛下顧茲當仁期以制義今王公侯伯卿士兆人詢謀僉同稽首闕下臣敢因衆人之議成小子之志上尊號於陛下曰太上至道聖皇天帝即命有司擇日奉行冊禮其錫臣帝號大聖二字伏願許

停如臣言可以簡當所希採納如臣誠不足動天伏當待罪將以明授受之道辨上下之分不勝臣子下情懇願之極伏惟陛下俯垂允許以副四海之望

再請上太上皇尊號表

陛下以宗社再安天下交泰付臣以神器授臣以寶符加臣以寵章錫臣以徽號君親之義惠下之道已彰臣子之心奉上之禮未足臣所以與王公卿士百辟兆人思垂裕後昆乃悉數前美仰陛下之行者衆星之拱北辰悅陛下之澤者百川之赴東海繇是累上尊號敢冒宸威陛下以

無爲之心不宰萬物抑而未允至于再三羣情禹禹罔知
所措一昨辛卯賜誥命曰頻覽章表懇至難違爾寶命惟
新洪名允集用加大聖之字克副昊天之心若成命無渝
萬國同歡於翊戴儻固辭不已吾亦未膺乎典冊今不許
撝謙令斷來表進迫嚴旨何以克堪退荷殊私無任隕越
小子伏受命矣伏惟陛下允臣所請則自下上上日月之
光昭從上下下雨露之恩廣臣已詢諸龜筮備其禮物請
以來月乙巳奉上冊禮聖恩招納即日付外施行不勝懇
願之至

謝進丹竈宣示史館表

臣伏奉恩命以臣所進藥器深合天心伏蒙特垂褒美令
頒示天下臣幸以菲才叨膺寶厯聖慈曲眷每事憂兢至
於孝養之宜臣子常禮先意承旨務達微誠不期進奉之
時偶合聖旨寧謂至誠能感事近前知以臣孝旣繇哀物
自冥應特加獎飾許載縑緡在臣下情彌增愧悚

張天師贊

德自清虛聖教之實或隱或顯是樸是質靜處瓊臺焚香
玉室道心不二是爲正一

葉法善像贊

昂昂高士瀟灑孤峙却立排煙乘霓控鯉果然不伐爲而不恃馭風冷然與物終始